

Organismo: Secretaría Xeral – Subdirección Xeral de Persoal – Servizo de Primaria

SUMARIO:

ORDE do 19 de outubro de 2006 pola que se convoca concurso de traslados específico entre os funcionarios de carreira do corpo de mestres para cubrir prazas de xefatura do departamento de orientación nos colexios públicos de educación infantil e primaria e de educación primaria dependentes da Consellería de Educación e Ordenación Universitaria.

TEXTO:

O Decreto 120/1998 do 23 de abril, (*Diario Oficial de Galicia do 27*), regula a orientación educativa e profesional na Comunidade Autónoma de Galicia.

O artigo 1º, alínea 2, deste decreto establece que nos colexios de educación infantil e primaria, e nos colexios de educación primaria, nas condicións que a Consellería de Educación e Ordenación Universitaria determine, creárase un departamento de orientación que abranguerá no seu ámbito de actuación, ademais do propio centro, aquel outros centros incompletos da mesma zona de escolarización. Este departamento estará coordinado por un mestre responsable da orientación educativa, que exercerá as súas funcións como xefe do dito departamento.

Pola súa parte o artigo 13º do referido decreto establece que a Consellería de Educación e Ordenación Universitaria cubrirá o posto de traballo do responsable do departamento de orientación naqueles colexios de educación infantil e primaria ou de educación primaria que se determine, a través dun concurso de méritos específico entre os funcionarios do corpo de mestres. Considérase criterio preferente estar en posesión dunha das seguintes titulacións: doutor ou licenciado en psicopedagogía, ou en psicoloxía, ou en filosofía e ciencias da educación (especialidade de psicoloxía ou ciencias da educación) ou en filosofía e letras (especialidade de pedagogía ou psicoloxía), tal como figura na alínea a) do artigo 4º do dito Decreto.

Na disposición derradeira primeira do Decreto 120/1998, autorízase á Consellería de Educación e Ordenación Universitaria para dictar cantas disposicións sexan precisas para a execución e desenvolvemento do que nel se establece.

Na súa virtude esta CONSELLERÍA DE EDUCACIÓN E ORDENACIÓN UNIVERSITARIA,

DISPÓN:

Primeira.- Convocar concurso de traslados específico entre os funcionarios de carreira do corpo de mestres para cubrir prazas de xefatura do departamento de orientación en colexios públicos de educación infantil e primaria ou de educación primaria.

Segunda.- As prazas que se cubrirán neste concurso son as que aparecen no Anexo II desta orde, e as resultas que se poidan producir nos centros que aparecen no Anexo III.

Terceira.- Poderán participar, na presente convocatoria:

- a) Os funcionarios do corpo de mestres que estean en situación de servizo activo con destino definitivo en centros dependentes da Consellería de Educación e Ordenación Universitaria, sempre que, de conformidade co establecido no parágrafo segundo do número 6 da disposición adicional décimo quinta da Lei 30/1984, do 2 de agosto e no Real Decreto 2112/1998, do 2 de outubro, transcorresen ó remate do presente curso académico, polo menos dous anos desde a toma de posesión do último destino definitivo.
- b) Así mesmo poderán participar os funcionarios de carreira do corpo de mestres en expectativa de destino nun centro dependente da Consellería de Educación e Ordenación Universitaria.

Cuarta.- A solicitude farase a través de internet, empregando o portal educativo no enderezo www.edu.xunta.es/persoalconcursos/primaria. Lémbrese que para acceder a este servizo web é preciso ter conta de correo electrónico no dominio edu.xunta.es polo que se urxe a quen non a teña proceda a solicita-la polos medios actuais (solicitude a través do secretario do centro actual á U@Cega no 902905445).

Tódolos participantes deberán presenta-la solicitude impresa e asinada no rexistro da Consellería de Educación e Ordenación Universitaria, nas súas delegacións provinciais, nas secretaría dos centros docentes ou en calquera das dependencias a que alude o artigo 38 da Lei 30/1992, do 26 de novembro, de réxime xurídico das administracións públicas e do procedemento administrativo común.

Debe terse en conta que as secretarías dos centros docentes non son unha das oficinas nas que se pode presentar documentos dirixidos a calquera organismo público, conforme co establecido no artigo 38 da Lei 30/1992, do réxime xurídico das administracións públicas e do procedemento administrativo común.

Os que aleguen, ademais, estar en posesión dunha das titulacións sinaladas na base décima da presente Orde, presentarán fotocopia cotexada do título correspondente. Así mesmo, os que aleguen estar habilitados en pedagogía terapéutica ou en audición e linguaxe, presentarán fotocopia cotexada do certificado da habilitación.

Quinta.- O prazo de presentación de solicitudes e documentos será do 27 de outubro ó 15 de novembro ambos incluídos. Finalizado este prazo non se admitirá cambio ningún nas súas peticións.

Non obstante a folia de servizos, a efectos de determina-la puntuación dos concursantes, pecharase o 16 de novembro de 2006.

Sexta.- Os asinantes das instancias deberán manifestar nelas, de modo expreso, que reúnen os requisitos esixidos na convocatoria, consignando os centros que solicitan por orde de preferencia,

cos números de código que figuran nos Anexos II e III da presente Orde.

Sétima.- Tódalas condicións que se esixen nesta convocatoria e os méritos que aleguen os participantes teranse cumpridos ou recoñecidos na data de terminación do prazo de presentación de solicitudes, agás o requisito de dous anos de permanencia no destino definitivo desde o que se solicita, que se contabilizarán a 31 de agosto do 2007.

Oitava.- Non serán tidos en conta os méritos non invocados nas solicitudes, nin tampouco aqueles que non se xustifiquen documentalmente durante o seu prazo de presentación.

Novena.- Poderá ser anulado o destino obtido por calquera concursante que non se axuste ás normas da convocatoria.

Décima.- Dereito preferente:

Os profesores que se acollan ó dereito preferente farano constar nas súas instancias, indicando a causa na que apoian a súa petición.

Para os efectos de adxudicación de prazas só se terá en conta o seguinte dereito preferente:

Terán dereito preferente, a centro ou zona, os funcionarios de carreira do corpo de mestres ós que se lles suprimira o seu posto de traballo, sempre que continúen nesa situación e non perderan o dereito preferente consonte á normativa que regula o concurso de traslados e os mestres desprazados por falta de horario que posúan algunha das seguintes titulacións: doutor ou licenciado en psicopedagogía, ou en psicoloxía, ou en filosofía e ciencias da educación (especialidade de psicoloxía ou ciencias da educación) ou en filosofía e letras (especialidade de pedagogía ou psicoloxía) ou que foran diplomados nas Escolas Universitarias de Psicoloxía ata 1974.

Cando existan varios mestres que exercen o dereito preferente adxudicarase tendo en conta o establecido para os concursos xerais de traslados.

Décimo primeira.- Para a provisión das prazas que se cubrirán neste concurso, cando non se adxudiquen a través dos méritos preferentes establecidos na base décima, terán prioridade os mestres que posúan algunha das titulacións relacionadas na citada base. No suposto de concorrer máis dun aspirante, dirimiranse pola aplicación do baremo establecido no Anexo I.

No caso de se produciren empates no total das puntuacións, estes resolveranse, atendendo sucesivamente á maior puntuación en cada unha das alíneas do baremo establecido no Anexo I, pola orde na que aparecen nel. Se persistise o empate atenderase á puntuación obtida nas distintas subalíneas pola orde, igualmente, que aparece no dito baremo. Para estes efectos, deberá terse en conta que, naquelas alíneas ou subalíneas do baremo para as que se estableza unha puntuación máxima, a puntuación outorgada ós concursantes non poderá superala. De resultar necesario, utilizarase sucesivamente como último criterio de desempate o ano no que se convocou o procedemento selectivo a través do que se ingresou no corpo e a puntuación coa que resultou seleccionado.

Décimo segunda.- Para a baremación dos méritos previstos nos apartados g.1.5. e g.1.6 alegados polos concursantes constituirase unha comisión nomeada polo Secretario Xeral.

Cada un dos sindicatos pertencentes á mesa sectorial de educación poderá nomear unha

persoa representante para asistir ás sesións da comisión, con voz e sen voto.

A asignación da puntuación que lles corresponda ós concursantes polos restantes apartados do baremo de méritos, levarase a cabo por unha comisión constituída por funcionarios destinados na Consellería de Educación e Ordenación Universitaria.

Estas comisións estarán clasificadas na categoría primeira para efectos do previsto no Decrto 144/2001, do 7 de xuño, DOG do 25.

Décimo terceira.- Realizadas as baremacións dos méritos alegados polos concursantes procederase á publicación, na Consellería de Educación e Ordenación Universitaria, nas súas Delegacións Provinciais e na páxina web, das puntuacións acadadas polos participantes.

Establecerase un prazo de 10 días naturais para reclamar contra estas puntuacións. Rematado o citado prazo a comisión exporá as rectificacións que procederan.

Contra esta derradeira exposición non cabe reclamación e terá que esperarse a que a Secretaría Xeral faga pública no Diario Oficial de Galicia a resolución provisional.

Décimo cuarta.- Os concursantes poderán presentar reclamacións e renuncias á adxudicación provisional, ante a Secretaría Xeral, no prazo de oito días hábiles a partir da súa publicación no Diario Oficial de Galicia.

As persoas que desexen renunciar a súa participación neste concurso, deberán realizala aínda no suposto de non obter destino na resolución provisional, xa que de non facelo poderían obter destino a resolución definitiva.

Décimo quinta.- Consideradas, se é o caso, as reclamacións e renuncias ás que se refire a base anterior, a Secretaría Xeral procederá a dicta-la resolución definitiva da adxudicación. A dita resolución publicárase no Diario Oficial de Galicia.

Contra esta resolución os interesados poderán interpoñer recurso de alzada perante a conselleira de Educación e Ordenación Universitaria no prazo dun mes, contado a partir do día seguinte ó da súa publicación no DOG, segundo o disposto nos artigos 114 e 115 da Lei 4/1999 (BOE do 14 de xaneiro) de modificación da Lei 30/1992, de réxime xurídico das administracións públicas e do procedemento administrativo común.

De non publicarse a resolución definitiva no prazo de seis meses desde esta convocatoria, as solicitudes presentadas entenderanse desestimadas.

Décimo sexta.- Os funcionarios do corpo de mestres que acaden destino no presente concurso exercerán a xefatura do departamento de orientación con carácter definitivo.

Décimo sétima.- Os mestres que resulten adscritos ás xefaturas dos departamentos de orientación dos colexios de educación infantil e primaria e dos colexios de educación primaria están obrigados a desprazarse ós centros que se lles adscriban, conforme ó establecido no Decreto 120/1998 do 23 de abril.

Décimo oitava.- Nos colexios públicos de educación infantil e primaria e nos de educación primaria nos que a praza de xefatura do departamento de orientación sexa provista na resolución da

presente convocatoria, constituirase o departamento de orientación que terá a composición establecida no artigo 4º do Decreto 120/1998, do 23 de abril, polo que se regula a orientación educativa e profesional na Comunidade Autónoma de Galicia.

DISPOSICIÓNS ADICIONAIS

Primeira.- Os mestres que estean participando simultaneamente nesta convocatoria e na realizada pola Orde do 20 de outubro de 2006, pola que se convoca concurso de traslados de ámbito nacional entre funcionarios do corpo de mestres, e que obteñan praza definitiva da xefatura do departamento de orientación, entenderase que renuncian á participación no concurso xeral de estatal.

Segunda.- Contra esta Orde poderá interpoñerse recurso contencioso-administrativo nos prazos e forma establecidos na Lei reguladora da xurisdicción contencioso-administrativa.

Terceira.- Os participantes nos concursos xerais de traslados a partires do ano 2003/04 que estén participando no convocado pola Orde do 20 de outubro de 2006, e participen nesta convocatoria están exentos da presentación dos méritos xa xustificadas, agás os correspondentes á alinea H do Anexo I da presente Orde, que sí deberán xustificarse.

Así mesmo os participantes nos concursos de traslados específicos para cubrir prazas de xefatura do departamento de orientación a partires do ano 2003/04 que dean por boa a puntuación asignada nos apartados E, F, G e H do dito concurso, non precisan achegar nova acreditación de méritos, agás que con posterioridade ó prazo de presentación de instancias do referido concurso acrediten novos méritos, debendo en ámbolos dous supostos sinalalo en folla aparte.

Santiago de Compostela, 19 de outubro de 2006
CONSELLEIRA DE EDUCACIÓN E ORDENACIÓN UNIVERSITARIA
Laura Sánchez Piñón

INSÍRASE NO DOG